

FAULA VIII.

LA SPA E LA LUMASSA-RABLOIRA.

Ant un d'coui Castei frust ch'ai stà le Masche
 Famous ant i so temp pr soe gran tour ,
 Sgarblà , tut-mes distrut , cuvert d' frasche :
Pr là ant una caverna a j' era ancour
 Soutrà 'n-mes al rotam , a la rumenta ,
 La spa ch' un di portava coul gran Sgnour ;
A l' era mancomal tuta rusnenta :
 Ma tant an mes al ruso , un sert barlum
 Mostrava ancour l' origine lusenta.
Rablandse , coum a l' è ant 'l so costum ,
 Slongand i corn na Lumassa-rabloira
 A j' è montaje adoss caria d' bavum.
La Spa s' buta a crié..... son pa na mssoira ,
 Am pijsto pr na ressia o pr un fausset ,
 Pr n' appia , pr na ranza , o na tisoira?
Sapia , che m' ant 'l secoul d' Bajaset ,
 Ai temp d' l Re Arduin e d' Carlo-Magno ,
 Tajava i Paladin com' d' ravanet !

E adess (l'otra ai rispond) mi t'scargno ;
S' i veui mi it pisso adoss , e con i corn ,
Se mi m' bateiss con ti , tant it guadagno.
Sta Faula a dev gaveje 'l capstorn
A coui ca vivo mac pr ampisse d' boria ;
Butè na pugnà d' paja drint an forn ,
A fa l'istess effet la nostra gloria.

